

Na osnovu čl. 4.2 i 7, Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/10), člana 14. Statuta Državne regulatorne komisije za električnu energiju ("Službeni glasnik BiH", br. 41/03 i 59/04) i čl. 42. i 50. Poslovnika o radu Državne regulatorne komisije za električnu energiju ("Službeni glasnik BiH", broj 2/05), na sjednici Državne regulatorne komisije za električnu energiju, održanoj 12. januara 2011. godine, donijet je

PRAVILNIK

O IZDAVANJU PRIVREMENIH LICENCI ZA OBAVLJANJE DJELATNOSTI DISTRIBUCIJE I SNABDIJEVANJA ELEKTRIČNOM ENERGIJOM U BRČKO DISTRIKTU BOSNE I HERCEGOVINE

Član 1. *(Predmet)*

Ovim Pravilnikom propisuje se procedura za izdavanje privremenih licenci za obavljanje djelatnosti distribucije i snabdijevanja električnom energijom za pravna lica sa sjedištem u Brčko Distriktu Bosne i Hercegovine.

Član 2. *(Posjedovanje licence)*

Za obavljanje djelatnosti distribucije i snabdijevanja električnom energijom u Brčko Distriktu Bosne i Hercegovine neophodno je posjedovanje licence izdate od strane Državne regulatorne komisije za električnu energiju (u daljem tekstu: 'DERK').

Član 3. *(Vrste i period važenja licenci)*

(1) U skladu sa ovim Pravilnikom DERK izdaje sljedeće licence:

- a) licenca za distribuciju električne energije,
- b) licenca za snabdijevanje električnom energijom.

(2) Period važenja licence izdate u skladu sa ovim Pravilnikom je do dvije godine.

Član 4. *(Podnosilac zahtjeva)*

Podnosilac zahtjeva za izdavanje privremenih licenci iz člana 3. ovog Pravilnika može biti samo postojeće pravno lice koje obavlja javnu uslugu distribucije i snabdijevanja električnom energijom u Brčko Distriktu Bosne i Hercegovine.

Član 5. *(Podnošenje zahtjeva)*

(1) Zahtjev za izdavanje licence se podnosi pisanim putem i uz zahtjev se u originalu ili ovjerenoj kopiji prilažu odgovarajući dokumenti iz člana 18. Pravilnika o licencama ("Službeni glasnik BiH", broj 38/05), u mjeri koja je prilagođena djelatnosti podnosioca zahtjeva.

(2) U toku postupka DERK može tražiti bilo koju drugu relevantnu informaciju.

Član 6.
(Postupak)

Privremene licence iz ovog Pravilnika DERK izdaje po skraćenom postupku, bez javne rasprave.

Član 7.
(Forma licence)

- (1) Licenca se izdaje u formi definiranoj od strane DERK-a.
- (2) Sastavni dio licence su Uvjeti za korištenje licence.

Član 8.
(Uvjeti za korištenje licence)

Uvjeti za korištenje privremene licence za obavljanje djelatnosti distribucije i snabdijavanja električnom energijom propisuju osnovne obaveze vlasnika licence, a zasnovani su na postojećoj regulatornoj praksi u Bosni i Hercegovini.

Član 9.
(Prijelazne odredbe)

Ostala pitanja u vezi izdavanja i posjedovanja privremene licence koja nisu definirana ovim Pravilnikom rješavaju se u skladu sa Pravilnikom o licencama i Pravilnikom o javnim raspravama ("Službeni glasnik BiH", broj 38/05).

Član 10.
(Stupanje na snagu)

Ovaj Pravilnik stupa na snagu danom donošenja, a objavit će se u "Službenom glasniku BiH" i u službenim glasilima entiteta i Brčko Distrikta Bosne i Hercegovine.

Broj: 05-28-12-009/11
12. januara 2011. godine
Tuzla

Predsjedavajući Komisije

Mirsad Salkić